

COMISSÃO DE INFRAESTRUTURAS RELATÓRIU FISKALIZASAUN IHA MUNISÍPIU LAUTÉM JANEIRU 2021



Preparadu husi Tékniku Komisaun:

Joaquim da Silva Xavier ho Vitorino de Deus

SUMÁRIU:

- I. INTRODUSAUN
- II. AUTORIZASAUN
- III. KOMPOZISAUN DELEGASAUN
- IV. OBJETIVU VIZITA
- V. PROGRAMA VIZITA
- VI. KONKLUZAUN
- VII. REKOMENDASAUN
- VIII. APROVASAUN
- IX. ANEXU

I. INTRODUSAUN

Komisaun E Parlamentu Nasional mak Komisaun Permanente ne'ebé aseguira iha orgânica Rejimental Parlamentu Nasional Timor-Leste, ho knar ba akompanhamentu iha âmbito especialidade nian, ne'ebé ligadu ho asuntu no matériasira hanesan:

(i) Kona ba atividade legislativa

(ii) Kona ba kontrolu no fiskalizaun ba atividadesira Governu nian ne'ebé hatur iha Rejimentu Parlamentu Nasional número 3 artigo 95.º no número 3 artigo 145.º Konstituisaun Repúblika Demokrátika Timor-Leste, no alínea c) artigo 35.º no artigo 79.º, tamba ne'e, realizaun ba vizita ida ne'e organiza tuir dispozisaun rejimental ne'ebé iha.

Rejimentu Parlamentu Nasional, fo Kompetênsia ba Komisaun Especializada Permanente sira, hodi hatene tuir asuntu sira polítiku, administrativu no apresia atku sira Governu nian;

Vizita técnica ne'e enkuadra tuir Planu atividade Komisaun E nian ba tinan 2020 no Planu vizita ne'e hetan aprovasaun husi deliberaun reuniaun Komisaun lora 20 Janeiro 2021 ne'ebé defini vizita trabalho ba Munisípiu Lautem ho objetivu atu observa kondisaun jeral atividade servisu Administrasaun ligadu ho projetu sira infraestrutura inklui halibur informasaun importante kona ba dezáfui no obstákulu enfrentada.

Informasaun jeral Munisípiu Lautem jeográficamente iha luan 1,813 km² ho total populaun 59,787 habitantes tuir sensu 2010. Administrativamente Munisipal Lautem iha postu administrativu 5, suku 34 no aldeia 151.

II. AUTORIZASAUN

Iha deliberaun reuniaun Komisaun Ene'ebe realiza iha lora 20 fulan Janeiro 2021, hodi decide vizita fiskalizaun ba Munisípiu Lautem.

III. KOMPOZISAUN DELEGASAUN

Delegasaun vizita komposta husi:

1. Deputadu Abel Pires da Silva (Presidente Comissão)
2. Deputadu Fabião de Oliveira (Vice-Presidente)

- | | |
|---|--------------|
| 3. Deputada Maria Anabela Savio | (Sekretária) |
| 4. Deputadu Marcos Xavier | (Membro) |
| 5. Deputadu Domingos Carvalho de Araújo | (Membro) |
| 6. Deputadu Mariano Fatubai Mota | (Membro) |
| 7. Deputadu Francisco David X. Carlos | (Membro) |
| 8. Deputadu Domingos Lemos | (Membro) |

Deputadu Arão Noé de Jesus Amaral (Membro) la partisipa maibe substitui husi Deputadu Domingus Lemos (Membro Komisaun G) tuir desizaun husi Bankada; Deputada Irene Gonzaga Sarmiento (Membro) ho Deputadu Adriano do Nascimento (membro) la marka prezensa ho razaun justifikadu. Fiskalizasaun hetan apoiu tékniku husi Joaquim da Silva Xavier ho Vitorino de Deus, Eskoltu 2, Jornalista RTPN 1, Tékniku DIRPEC 1 ho Motorista 9.

IV. OBJETIVU VIZITA

Atu observa servisu administrasaun pública relasiona ho projetu infraestruturas implementada sira no ezekusaun orsamentu iha kapital dezvoltamentu, prinsipalmente ba projetu PDIM, PNDS no Linha Ministerial (LM), inklui vizita ba eskritóriu Governu sira, hanesan eskritóriu Ministériu Obras Publika (MOP) ho Sentral EDTL. Vizita refere ho intensaun atu responde ba reklamasaun husi comunidade ho autoridade lokal.

V. PROGRAMA VIZITA

Programa vizita realiza hanesan tuir mai:

1. VIZITA ADMINISTRASAUN MUNISÍPIU

Vizita ho objetivu atu halao sorumutu ho Administraador Munisípiu ho ekipa linha ministerial relasiona hakarak rekolha informasaun ne'ebe iha relasaun ho asuntu infraestruturas, nune'e bele sai referensia ba atividade fiskalizasaun iha terenu Munisípiu Lautem nia laran. Vizita simu husi Administrador Munisípiu Lautem ho ekipa linha ministerial sira.

Iha biban da-uluk, Komisaun E husu ba Administrador atu bele ukun ho diak hodi lori mudansa ba Munisípiu Lautem durante mandatu, no hato'o objetivu vizita mai Munisípiu

Lautem ne'ebe prinsipalmente hakark hatene aktus Governu nian no implikasaun ba comunidade nia moris.

Administrador Munisípiu Lautem, Domingos Sávio ho honestu rekonhese-an katak hanesan lider foun ne'ebe sei persiza tempu hodi halo adaptasaun ba ambiente servisu ne'ebe hasoru dahuluk iha moris. Maibe hanesan jerasun foun prontu infrenta situasaun oioin no nafatin nakloke ba parte hotu nia apoiu. Maske foun iha lideransa-formal maibe mai ho mehi ida hakarak unifika forsa hotu iha Munisípiu Lautem hodi lori dezvoltimentu ba povu tomak, la haré ba koris partidu, grupu, suku no seluk tan. Além de administrador, sorumutu hetan mos partisipasaun husi parte interesante sira mak hanesan: Diretor Obras Públicas, Diretor PDIM, Ekipa Técnica ADN, Representante EDTL ho Diretor Interinu SAS.

Setor ne'ebe Komisaun E hakarak konvoka iha reuniaun laran, mak hanesan tuir mai, estrada, be'e-mos, eletridade, ponte ho seluk tan. Liu husi reuniaun refere Komisaun hakarak hatene kona ba nesidade munisípiu nian. Bele hatete ba Komisaun karik setor balu la konsege tau iha planu orsamentu 2021, Komisaun iha possibilidade bele apresenta iha proposta adisional planu OJE 2021-retifikativu maibe ho razaun ne'ebe justifikadu no konvensidu ne'ebe apresenta husi munisípiu. Iha mos sujestaun ba ADN atu apresenta projetu ne'ebe infrenta hela problema. Informasaun ne'ebe apresenta husi autoridade sira bele sai referensia iha Komisaun nia fiskalizaun ba terenu ho reforsa planu ba futuro. Ho nune'e, permite ba ekipa munisípiu hodi hato'o apresentasaun;

A. Administrador Munisípiu

Administrador Munisípiu Lautem, Domingos Sávio, da-uluk hato'o agradese ba Komisaun E ba vizita fiskalizaun iha Munisípiu Lautem. Fiskalizaun hodi observa direta progresu ho dezafius liga ba prosesu dezvoltimentu facilidades infrastrutras liu-liu estrada iza kapital laran. Tamba husi fiskalizaun bele deskobre problema ho obstaklu ne'ebe sai impedimentu ba dezvoltimentu iha munisípiu, nune'e bele sai referensia ba planu ida ke diak iha tempu oin. Husu ba Komisaun Parlamentar atu apoiu nafatin ba pedidu ou proposta ne'ebe karik sei hato'o iha tempu oin liga ba dezvoltimentu área infrastruturas estradas, pontes, valetas, bé-mos, eletridade no seluk tan.

Administrador Munisípiu rekonhese, facilidade estrada sai fator importante ba prosesu dezvoltimentu iha Munisípiu Lautem, inklui facilidades be-mos ho eletridade. Facilidade

tolu refere sai programa prioridades iha planu dezvoltimentu munisípiu ho objetivu atuliberta povu husi situasaun izoladu, hadian ekonómia povu ho fo moris diak ba povu. Planu dezvoltimentu setor tolu mensionadurefleta vizaun lideransa husi Administrador atual ne'ebeké sai preokupasaun bo'ot ba comunidade hori uluk to' o ohin loron.

Estrada, eletrisidade ho be-mos nudar infraestruturas bázika hodi fasilita setor sira seluk, inklui setor turizmu. Munisípiu Lautem iha potencia ba setor turizmu no hakarak dezvoltive setor refereba povu nia moris diak. Administrador Munisípiu iha planu oinsa bele dada turista mai Munisípiu Lautem. Iha turizmu oin 3 mak sai pontu atensaun ba Administrador, kompostu husi: turizmu relizioju, turizmu desportu ho turizmu kultural.



Delegasaun Komisaun E halao sorumutu ho Administrador Munisípiu Lautem hamutuk ho Diresaun relevante sira iha sala reuniaun Administrasaun Munisípiu Lautem, Fevereiru 2021. (Dok.KI 2021)

Iha mos programa sulan animal ho objetivu eduka comunidade oinsa hakiak animal ho diak hodi bele kontribui ba prosesu dezvoltimentu munisipal: apoiu programa hamos sidade, saúde komunitáriu, hamenus risku dezastre tráfiku ho seluk tan. Planu refere tama iha agenda Administrador hodi hasa'e sivilizasaunmoris nudar povu iha Munisípiu Lautem.

Além de planu, iha mos obstaklu ne'ebe Munisípiu Lautem infrenta, prinsipalmenteliga ba kompetensia autoridade iha prosesu hola desizaun ba planu ne'ebe refleta interese munisípiu. Dala barak implementasaun projetu ne'ebe introduz husi nasional la koresponde ho interese comunidade iha baze. Nudar auotoridade munisipal, hakarak sujere atu hadian matéria husi lei

refere ho intensaun bele hakbiit administrador nia pozisaun iha prosesu foti desizaun sira ne'ebe favorese ba interese munisípiu.

Hafoinhalo tiha introdusaun, tuir mai Adminitrador Munisípiu fo biban ba diresoens sira hodi hato'o informasoens relasiona ho área infraestrutras.

1. Diresaun Obras Pública

Diretor Obras Pública Munisípiu Lautem, Abrão Vieira, da-uluk informa kona ba total projetu ne'ebe rejista iha Munisípiu Lautem, ne'ebe kompostu iha projetu 21 ho total orsamentu \$ 28,839,692.39. Projetu 21 totalmente kona ba setor estrada ne'ebe mai husi tinan 2016 to'o 2021. Maioria obra seidak finaliza tamba kestaun limitasaun finanseira ne'ebe infrenta husi kompanhia sira. Kona ba projetu 21 hato'o iha deskrisaun tuir mai;

1. Rehabilitasaun Estrada Rural "Laleno – Soruwaku". Projetu lokaliza iha Suku Maina II, Postu Administrativu Lautém Moro. Projetu halao husi kompanhia IRLOYVON UNIP. LDA. ho total orsamentu \$ 4,782,693.68. Progresu fíziku atinji ona 100% no halao husi fulan julhu 2016 to'o julhu 2017. Projetu refere extende dala 4 iha dezembru 2018, abril 2019, abril 2020 no dezembru 2020.
2. Rahabilitasaun Estrada Nasional "Tutuala – Walu" (ch. 0 + 000 – 3 + 850). Projetu lokaliza iha Suku Tutuala, Postu Postu Administrativu Tutuala. Projetu halao husi kompanhia WACU-HIAMOINU UNIP. LDA. ho total orsamentu \$ 3,104,481.77. Progresu fíziku atinji 63.70% no halao husi fulan agostu 2017 to'o fevereiru 2019. Projetu extende faze 2 iha fevereiru 2020 no dezembru 2020.
3. Rahabilitasaun Estrada Nasional "Tutuala – Walu" (ch. 3 + 850 – 7 + 725). Projetu lokaliza iha Suku Tutuala, Postu Postu Administrativu Tutuala. Projetu halao husi kompanhia HAMUTUK UNIP. LDA. ho total orsamentu \$ 3,008,551.46. Progresu fíziku foin atinji 25.44%, ne'ebe realiza iha fulan agostu 2017 to'o fevereiru 2019. Projetu extende dala 2 iha fevereiru 2020 no dezembru 2020.
4. Rehabilitasaun Estrada Rural "Mahina I – Parlamento" (3,916M). Projetu lokaliza iha Suku Parlamento, Postu Administrativu Lautém Moro. Projetu halao husi kompanhia SAMUDRA UNIP. LDA. ho total orsamentu \$ 3,039,825.77. Progresu fíziku atinji ona 100% ne'ebe realiza husi fulan setembru 2017 to'o outubru 2018 no prosesu pagamentu halao ona 79.74%. Projetu extende dala 3 iha agostu 2019, dezembru 2019 no dezembru 2020.

5. Rehabilitasaun Estrada Rural “Laivai – Wairoque – Liarafa (7.720M) Faze I. Projetu lokaliza iha Suku Laivai, Postu Administrativu Luro. Projetu halao husi kompanhia HOWEN II UNIP. LDA. ho total orsamentu \$ 4,207,194.97. Progresu fíziku atinji ona 100%, ne’ebe halao husi fulan setembru 2017 to’o agostu 2019. Projetu extende dala 3 iha agostu 2019, dezembru 2019 no dezembru 2020.
6. Rehabilitasaun Estrada Rural “Trisula – Com” (ch. 0 + 000 – 8 + 000). Projetu lokaliza iha Suku Fuiloro, Com, Postu Administrativu Lautém Moro. Projetu halao husi kompanhia SALVE UNIP. LDA. ho total orsamentu \$ 4,092,376.19; Progresu fíziku atinji 50.96%, husi fulan setembru 2017 to’o setembru 2019. Projetu extende dala 1 iha agostu 2020.
7. Rehabilitasaun Estrada Nasional “Trisula – Com” (ch. 8 + 000 – 15 + 400). Projetu lokaliza iha Suku Com, Postu Administrativu Lautém Moro. Projetu halao husi kompanhia FIAN UNIP. LDA. ho total orsamentu \$ 4,028,818.80. Progresu fíziku atinji 45.72% no halao husi fulan setembru 2017 to’o setembru 2019. Projetu extende dala 1 iha dezembru 2020.
8. Rehabilitasaun Estrada Nasional “Luro – Kotamutu – Lakawa” (ch. 0 + 000 – 7 + 500). Entidade projetu mak MOP, R4D (ILO). Projetu lokaliza iha Suku Luro, Kotamutu no Lakawa, Postu Administrativu Luro. Projetu halao husi kompanhia CAMBOTA UNIP. LDA. ho total orsamentu \$ 62,781.36. Progresu fíziku atinji 30% no halao husi fulan agostu 2019 to’o setembru 2020.
9. Rehabilitasaun Estrada Rural “Luro – Baricafa” (0 + 000 – 7 + 000). Entidade projetu mak MOP, R4D (ILO). Projetu lokaliza iha Suku Barikafa, Postu Administrativu Luro. Projetu halao husi kompanhia PEREKIKI UNIP. LDA. ho total orsamentu \$ 161,431.38. Progresu fíziku atinji 45.54% no no halao husi fulan setembru 2019 to’o setembru 2020.
10. Rehabilitasaun Estrada Rural “Dasidara – Lequidiga” (0 + 000 – 10 + 000). Entidade projetu mak MOP, R4D (ILO). Projetu lokaliza iha Suku Ililai, Postu Administrativu Lautém Moro. Projetu halao husi kompanhia ANAM-LINDO UNIP. LDA. ho total orsamentu \$ 84,077.42. Progresu fíziku atinji 30.27% no halao husi fulan setembru 2019 to’o setembru 2020. Projetu extende dala 1 iha marsu 2021.
11. Rehabilitasaun Estrada Rural “Suco Souro” (0 + 000 – 2 + 500). Entidade projetu mak MOP, R4D (ILO). Projetu lokaliza iha Suku Soru, Postu Administrativu Lospalos-Vila. Projetu halao husi kompanhia ULAU UNIP. LDA. ho total orsamentu \$ 216,525.57. Progresu fíziku atinji 65% no halao husi fulan setembru 2019 to’o setembru 2020.

12. Rehabilitasaun Estrada Rural “Home” (0 + 000 – 1 + 200). Entidade projetu mak MOP, R4D (ILO). Projetu lokaliza iha Suku Home, Postu Administrativu Lospalos-Vila. Projetu halao husi kompanhia PAYAHARA UNIP. LDA. ho total orsamentu \$ 264,203.18. Progresu fíziku atinji 15.70% no halao husi fulan fevereiru 2020 to’o fevereiru 2021.
13. Rehabilitasaun Estrada Rural “Home” (1 + 200 – 2 + 500). Entidade projetu mak MOP, R4D (ILO). Projetu lokaliza iha Suku Home, Postu Administrativu Lospalos-Vila. Projetu halao husi kompanhia PAYAHARA UNIP. LDA. ho total orsamentu \$ 287,376.91. Progresu fíziku atinji 7.44% no halao husi fulan fevereiru 2020 to’o fevereiru 2021.
14. Rehabilitasaun Estrada Rural “Apatmutu – Larimi – Canfuro” (0 + 000 – 2 + 600). Entidade projetu mak MOP, ERA (ILO). Projetu lokaliza iha Suku Cainleu, Postu Administrativu Iliomar. Projetu halao husi kompanhia ILE CHAO UNIP. LDA. ho total orsamentu \$ 224,619.19. Progresu fíziku atinji 6.21% no halao husi fulan setembru 2020 to’o junhu 2021.
15. Rehabilitasaun Estrada Rural “Apatmutu – Larimi – Canfuro” (2 + 600 – 5 + 200). Entidade projetu mak MOP, ERA (ILO). Projetu lokaliza iha Suku Cainleu, Postu Administrativu Iliomar. Projetu halao husi kompanhia FUILOORO UNIP. LDA. ho total orsamentu \$ 184,685.74. Progresu fíziku atinji 4.75% no halao husi fulan setembru 2020 to’o junhu 2021.
16. Rehabilitasaun Estrada Rural “Apatmutu – Larimi – Canfuro” (5 + 200 – 7 + 800). Entidade projetu mak MOP, ERA (ILO). Projetu lokaliza iha Suku Cainleu, Postu Administrativu Iliomar. Projetu halao husi kompanhia IRMÃOS-UNIDOS CONST. UNIP. LDA. ho total orsamentu \$ 174,653.97. Progresu fíziku atinji 2.82% no halao husi fulan setembru 2020 to’o junhu 2021.
17. Rehabilitasaun Estrada Rural “Apatmutu – Larimi – Canfuro” (7 + 800 – 10 + 780). Entidade projetu mak MOP, ERA (ILO). Projetu lokaliza iha Suku Cainleu, Postu Administrativu Iliomar. Projetu halao husi kompanhia OM BROTHERS. UNIP. LDA. ho total orsamentu \$ 227,832.84. Progresu fíziku atinji 12.15% no halao husi fulan setembru 2020 to’o junhu 2021.
18. Rehabilitasaun Estrada Rural “Caidavalarin– Liafalun” (0 + 000 – 1 + 430). Entidade projetu mak MOP, ERA (ILO). Projetu lokaliza iha Suku Cainleu, Postu Administrativu Iliomar. Projetu halao husi kompanhia SARGAS UNIP. LDA. ho total orsamentu \$

128,967.92. Progresu fíziku atinji 5.87% no halao husi fulan setembru 2020 to’o junhu 2021.

19. Rehabilitasaun Estrada Rural “Souro – Laturula” (0 + 000 – 2 + 300). Entidade projetu mak MOP, ERA (ILO). Projetu lokaliza iha Suku Souro, Postu Administrativu Lospalos-Vila. Projetu halao husi kompanhia TCHAI CELEIRO. UNIP. LDA. ho total orsamentu \$ 237,308.81. Progresu fíziku atinji 10.94% no halao husi fulan setembru 2020 to’o junhu 2021.
20. Rehabilitasaun Estrada Rural “Souro – Nairete - Leuro” (0 + 000 – 3 + 250). Entidade projetu mak MOP, ERA (ILO). Projetu lokaliza iha Suku Souro, Postu Administrativu Lospalos-Vila. Projetu halao husi kompanhia ZORO CONST. UNIP. LDA. ho total orsamentu \$ 271,480.30. Progresu fíziku atinji 5.40% no halao husi fulan setembru 2020 to’o junhu 2021.
21. Rehabilitasaun Estrada Rural “Lospalos – Souro” (0 + 000 – 5 + 800); “Leuro – Sorulua” (0 + 000 – 3 + 000). Entidade projetu mak MOP, ERA (ILO). Projetu lokaliza iha Suku Souro, Postu Administrativu Lospalos-Vila. Projetu halao husi kompanhia AFABUBO-FURAK. UNIP. LDA. ho total orsamentu \$ 49,805.16. Progresu fíziku atinji 100% no halao husi novembru 2016 to’o novembru 2017. Projetu extende dala 1 iha dezembru 2019.

2. Diresaun Ajensia Dezenvolvimentu Nasional – ADN

Jeralmente, projetu ne’ebe hetan atensaun husi ADN mai husi fundu 3, kompostu, fundu infraestrutura (FI), fundu R4D (ILO) ho Projetu Linha Ministeriais (LM). Total projetu iha 16 ho kompozisaun, FI iha 7, R4D (ILO) iha 6 no PLM iha 3. Detalhamente deskreve iha tabela tuir mai;

Nú.	Naran projetu no lokal	Kompanhia	Progresu Fíziku (%)	Pagamentu (%)	Obs.
Fundu Infraestrutura (FI)					
1.	Konstrusaun estrada Home-Lautém	Hoven, Unip.Lda	100%	98,60%	Persiza kompleta dokumentu liga ba mudansa iha terenu
2.	Konstrusaun estrada Tutuala-Valu	Consorcio		26,91%	
3.	Projetu Tutala-Valu	Kompanhia 6		16,60%	
4.	Projetu estrada Trisula-Com	Xave, Unip.Lda		41,96%	
5.	Konstrusaun Estrada Asalaiano-Com	Fian, Unip.Lda		44,46%	
6.	Konstrusaun estrada Parlamento-Mahina I	Samudra Construction	100%	79,74%	Iha volume balu seidak finaliza, dokumentu ho dezenhu

7.	Konstruasaun estrada ba Mahina II	Lifrovon Construction	100%	55,66%	
Fundu R4D					
1.	<ul style="list-style-type: none"> Manutensaun estrada Lospalos-Souro no; Manutensaun estrada Leuro 2 	Afabubu Construction		86,99%	
2.	Manutensaun estrada Luro-Baricafa	Perekiki Construction		41,89%	
3.	Manutensaun estrada Losplaos-Souro	Ulau Construction		57,72%	
4.	Manutensaun estrada Tasidara-Lekidida	Framalindo Const.		28,81%	
5.	<ul style="list-style-type: none"> Rehabilitasaun estrada (rural road Fuiloro-Home pakote 1 Pakote 2 	Pagahari Const.		14,56%	
				6,39%	
Projetu Linha Ministeriais					
1.	Manutensaun estrada (projetu taka kuak) Lospalos-Iliomar	Lero Const.		92,80%	
2.	Manutensaun estrada (projetu taka kuak) Iliomer-Aelebere	King Ly Const.	100%	100%	
3.	Konstroio bronzo Ponte Mau-Moco	Densio Const.	100%	0	Pagamentu seidaok halao tamba maske iha kontratu maibe tama iha projetu ne'ebe'e la liu husi verifikasaun ADN (2019)-tama lista 162 projetus.

Além de projetu estrada, eziste mos projetu 9 seluk ne'ebe tama kategória PDIM ho LM ne'ebe tama iha lista ADN, mak hanesan iha tabela tuir mai:

No.	Naran Projetu	Valor Kontratu	Kontrator	Kategoria	Tinan	Progresu Fíziku	Progresu Pagamentu
1.	Konstrusaun EBF Boboira, Luro	\$76,086.10	Rikfren Unip.Lda	PDIM	2019	100%	100.00%
2.	Konstrusaun Postu Saúde no Uma Dotor iha Ira-Darate, Iliomar	\$188,968.64	Diroma Unip.Lda	PDIM	2019	84%	96.00%
3.	Konstrusaun Postu Administrativu Luro/Lautem	\$787,688.76	Om Brather	PDIM	2019	99.57%	100%
4.	KONSTRUSAUN FOUN BA EDIFÍSIU PROKURADORIA DISTRITAL, REZIDENTI NO EDIFÍSIU BA APOIU NIAN	\$710,074.64	Cambota Lda.	PLM		38%	25.24%
5.	Konstrusaun no instalasaun sistema be'e-mos iha aldeia Homokanu, Foema, Nanakuru no EBF Souro, PA Lospalos Vila	\$255,685.00	Paza-Conis, Unip.Lda	PLM	2020	55%	25.15%
6.	Konstrusaun be'e-mos sistema bomba no gravitasaun, Tchay Titilary, Nuhallata, PA Lospalos-Vila	\$419,409.00	Ukat Mape Goll Unip.Lda	PLM	2019	75%	33.53%
7.	Prefurasaun sistema be'e-mos	\$140,470.95	Mai Moco	PLM	2017	80%	80%

	iha Aldeia Pa Papa, Suku Fuiluro, PA Lospalos-Vila		Unip.Lda				
8.	Prefurasaun sistema be'e-mos iha aldeia Homakanu no aldeia Foemaa, Suku Souro	\$109,783.87	Om Brather's	PLM	2019	25%	0.00%
9.	Contract for design and build of veteran houses	\$788,921.55	Davinci Const.Unip. Lda.	PLM	2016	80%	54,54%

3. Diresaun Serviço Agua e Saneamento

Diretor Interinu Serviços Agua e Saneamento (SAS) Munisípiu Lautem informa, katak Diresaun SAS Munisípiu Lautem iha tinan 2020 laiha verba kapital dezvoltimentu hodi ezekuta projetu foun, no situasaun refere lao kuaze tinan 2 nia laran. Ho nune'e, SAS nia atividade sei kontinua tau-matan ba projetu 4 husi nasional ne'ebe eziste nanis, kompostu hanesan tuir mai:

- a. Projetu 2020: Konstrusaun no instalasaun sistema be'e-mos iha aldeia Homokanu, aldeia Foemaa, aldeia Nanakuru no EBF Souro, Postu Administrativu Lospalos-Vila. Progresu fíziku atinji 55%;
- b. Projetu 2019: Konstrusaunbe'e-mos sistema bomba no gravitasaun, Tchay Titilary, Nuhallata, Suku Lorehe II, Postu Administrativu Lospalos-Vila. Progresu fíziku atinji 75%;
- c. Projetu 2017: Prefurasaun sistema be'e-mos iha Aldeia Pa Papa, Postu Administrativu Lospalos-Vila. Progresu fíziku atinji 80%;
- d. Projetu 2019: Prefurasaun sistema be'e-mos iha aldeia Homakanu no aldeia Foemaa, Suku Souro, Postu Administrativu Lospalos-Vila. Progresu fíziku atinji 25%.

Kona ba prosesu pagamentu ba projetu 4 refere, husi munisípiu laiha konhesimentu klean kona ba progresu pagamentu tamba halao direta husi nasional. Parte munisipal so bele halo akompanhamentu ba projetu maibe laiha kbiit atu halo desizaun ba progressaun projetu be'e-mos iha munisípiu. Durante tinan 2 Munisípiu Lautém laiha fundu kapital dezvoltimentu hodi finansia projetu be'e-mos no fundu refere mai husi nasional maske planu kona ba projetu refere inisia husi munisípiu desde elaborasaun planu estratéjiku nasional iha tinan 2011.

Iha tinan 2011 SAS Munisípiu Lautem hatama ona iha planu estratéjiku kona ba perfurasaun be'e iha Valu, Postu Administrativu Tutuala, ho intensaun hodi apoiu ba comunidade lokal ho fatin turismu sira iha área refere. Maibe relasiona ho empase política

maka SAS so bele atende deit projetu ne'ebe lao hela. Informasaun refere hodi responde ba preokupasaun Komisaun E em relasaun oinsa SAS nia esforsu ba aproveitamentu fonte be'e husi lagua Iralalaru hodi fornese ba área norte ne'ebe iha potencialidade ba setor túrismu, hanesan Com ho Jaco.

Kona ba planu forneshimentu be'e-mos ba vila-laran, iha ona master plan ne'ebe finansia husi ADB maibe dala wa'in infrenta probelam kona ba fonte be'e (be'e-matan). Más felizmente iha Detail Engineering Design (DED) konklui ona be'e-matan iha Suku Souro no iha ona dalan ba tenderizasaun ne'ebe fundu mai husi impréstimu. Além de be'e-matan, kestaun jestaun be'e-mos sai mos preokupasaun ba SAS, tamba kuaze 85% comunidade kapital iha asesu ba be'e-mos maibe falta jestaun hodi orienta comunidade atu utiliza be'e ho responsabilidade. Ba futuro SAS iha planu sei halo kontrolu rigor ba utilizador be'e-mos iha Munisípiu Lautem, liu-liu ba utilizador iha Lospalos-Vila. Iha esperiensa diak mai husi Postu Administrativu Tutuala ne'ebe iha tinan kotuk aplika ona ba comunidade mak selu tékniku rasik ho kustu \$40 kada fulan servisu dala ha'at.

4. Diresaun EDTL

Kliente EDTL Munisípiu Lautem rejista iha total 12,209. Husi total refere, iha kliente 5660 uza kontador prepago no 6549 uza kontador konvensional. Razaun kliente maioria seidak uza prepago tamba laiha orsamentu relasiona ho impase polítika anivel nasional. Postu Administrativu (PA) Lospalos iha suku 1 ho balu husi total suku 10 mak seidak instala prepago.

Kona ba asesu eletrisidade anivel suku, husi total suku 34 asesu hotu ona ba eletrisidade, so aldeia balu mak seidak asesu ba enérjia eletrisidade. Iha aldeia 22 husi total 151 mak seidak asesu eletrisidade. Aldeia ne'ebe seidak asesus eletrisidade tamba kestaun distansia ho total populasaun ne'ebe la priense kritériu. Aldeia ne'ebe seidak asesu eletrisidad kompostu husi:

- a. Postu Administrativu Lospalos-Vila iha aldeia 2;
- b. Postu Administrativu Luro iha aldeia 4;
- c. Postu Administrativu Iliomar iha aldeia 8;
- d. Postu Administrativu Lautem/Moro iha aldeia 8.

Kna ba projetu **média tensaun ho baixa tensaun** eziste 1 iha Suku Vairoque Postu Administrativu Luro, maibe paradu tamba kompanhia la kontinua servisu. Maske enérjia eletrisidade iha más rede ho atividade tékniku paradu. Atualmente assistensia tékniku organiza husi xefi suku ou comunidade lokal ho EDTL munisipal, liu-liu ba atende servisu manutensaun. Hetan mos projetu **média tensaun ho baixa tensaun** 2 iha Postu Administrativu Iliomar. Projetu 1 husi Karakuta ba Irabere ne'ebe seidauk remata. Projetu 1 seluk seidauk remata no husi kompanhia promete atu tutan maibe to'o adata la realiza no husi EDTL munisipal relata ona asuntu refere ba nasional.

Kona ba konsultasaun mudansa EDTL ba empreza públika, Tékniku EDTL hatete katak iha munisípiu sei halao servisu hanesan uluk no seidauk rona ou senti iha mudansa ruma maske iha informasaun katak mudansa halo ona iha janeiru 2021.

Eziste mos impedimentu projetu eletrisidade iha Munisípiu Lautem ne'ebe kauza husi comunidade rasik tamba diferente partidu polítiku, grupu no problema sosial. Maibe ho lideransa Administrador atual sei la tolera ba kualker aktus ne'ebe halo impedimentu ba desenvolvimentu iha Munisípiu Lautem. Administrador husu liu-liu ba Grupu Veteranu ho Jersaun Patriota sira atu sai autor ba desenvolvimentu no labele sai impededor ba desenvolvimentu iha Munisípiu Lautem. Sujere mos atu prosesu hotu kona ba tenderizasaun projetu tenki halao ho transparentu no imparcial, labele haré ba koris partidu ká grupu, maibe kaer nafatin ba filozofia ho disiplina husi veteranos katak “unidade mak forsa”.

Maske institusionalmente EDTL fo rendimentu ba kofre Estadu, maibe realmente servisu EDTL sei infrenta defikuldade iha terenu. Defikuldade ne'ebe infrenta deskreve hanesan tuir mai:

1. Infraestrutura

- Laiha edifísiu própriu ba EDTL, provizóriamente okupa hela rezidensia ofisial husi administrador munisipal;

2. Transporte

- Iha viaturas 2 maibe a'at, persiza viatura hodi fasilita servisu operacional, liu-liu hodi atende servisu emerjensia sira. Dala barak uza mikrolet hodi tula ekipamentu hanesan eskada 12 M hodi ba atende comunidade;
- Kada postu hetan motorizada 1 ba ema nain 2; dala barak halao servisu emerjensia ba terenu uza motorizada no siguransa moris nafatin amiasadu;

3. Rekursu Humanu

- Menus tékniku iha postu administrativu no atual iha deit ema nain 2 kada postu, persiza tékniku minimal ema nain 4 to'o 6 kada postu hodi halo servisu troka malu;
- Eziste pesoal voluntáriu 13 anivel munisipal;

4. Ekipamentu

- Jerador 5 la funsiona maske diak;

6. Diresaun PDIM

Projetu Programa Dezenvolvmentu Integradu Munisípiu (PDIM) Lautem husi tinan 2018 ba kotuk laiha problema, maibe projetu 2018 mai oin iha projetu 3 ne'ebe pertensia ba projetu PDIM, kompostu husi:

- a. Konstrusaun foun muru no edifísiu Postu Administrativu Luro, ne'ebe halao husi kompanhia OM BROTHER'S UNIP. LDA. no halao iha tinan 2019. Total orsamentu ba projetu refere \$ 187,688.75, no progresu fíziku atinji ona 100%. Pagamentu halao ona \$168,919.89 (99.57%) no falta \$18,768.86 (0,43%).
- b. Konstrusaun foun postu saúde Iradarate iha Postu Administrativu Ilioar ho uma ba médiku, ne'ebe halao obra husi kompanhia DIROMA UNIP. LDA. iha tinan 2019. Orsamentu ba projetu refere ho total \$188,968.64, no progresu fíziku atinji ona 84%. Pagamentu halao ona 96.00%.
- c. Konstrusaun foun Eskola Bázika Filial Bobo-Ira iha Postu Administrativu Luro. Projetu halao husi kompanhia RIKFREM UNIP. LDA. iha tinan 2019. Valor kontratu ba projetu refere \$ 76,086. 10, no progresu fíziku atinji ona 100%. Pagamentu halao ona 100%.

5. Prezidente CCI Munisípiu Lautem

Iha biban ho fatin hanesan, Komisaun mos hetan sorumutu husi ekipa Câmara Comércio Industri (CCI) Munisípiu Lautem. Prezidente CCI Munisípiu Lautem – Custódio Lopes, iha biban ne'e hato'o preokupasaun ne'ebe atualmente CCI infrenta, liu-liu liga ba direitu ho oportunidade ba kompanhia Timor-oan hanesan parseiru úniku ba Governu ou Estadu.

Liga ba oportunidade, oinsa kompanhia Timor-oan bele hetan oportunidade máximu husi Governu hodi desenvolve munisípiu rasik, especialmente lori susesu ba Munisípiu Lautem ne'ebe uluk konhesidu hanesan celeiro ba Timor-Leste.

Liga ba direitu, oinsa Estadu bele rekonhese pagamentu ba obra ne'ebe halao ona husi kompanhia lokal sira, inklui obra emerjensia ne'ebe to'o ohin lora a'at fila fali tamba kestaun natureza. Ejizensia refere nudar meu husu apoiu ba Governu atu kapitaliza kompanhia Timor-oan bele eziste ba futuru ne'ebe diak liu. Tamba realmente membru CCI Munisípiu Lautem maioria iha área konstrusaun sivil, ne'ebe infrenta problema bo'ot liga ba projetu 143 ne'ebe to'o agora seidak iha solusaun. Obra ne'ebe halao maioria bazeia deit ba ordem trabalhu husi sesante Ministru Obras Públika. Ezemplu, planu konstrusaun estrada Lautem – Lospalos-Vila ne'ebe iha ordem trabalhu, BOQ verifikadu ADN ho dezenhu ne'ebe husi kompanhia halo ho osan bo'ot maibe to'o ohin lora laiha kontinuasaun.

Tuir Prezidente CCI Munisípiu Lautem, apoiu kapitalizasaun ba kompanhia lokal importante ba sustentabilidade ekonómia munisípiu rasik, duke tau-laran ba kompanhia husi rai-liur ne'ebe lori osan sai hotu ba estranjeiru. Laos deit kestaun ekonómia, maibe implika mos ba qualidade obra ne'ebe sensivel liu ba kapital duké nasaun. Bainhira Estadu la fo importansia ba kompanhia lokal, maka lora ida ekonómia nasional sei kontrolu husi ema estranjeiru no ba futuru Timor-Leste bele infrenta krize monetária hanesan akontese ba Indonézia iha tinan 1997.

Deklarasaun ne'ebe CCI hato'o bazeia ba realidade atual iha terenu iha ne'ebe projetu montante bo'ot kuaze Estadu fo liu oportunidade ba kompanhia estranjeira hanesan xina ho indonézia, hodi husik kompanhia Timor-oan sai vizitante iha rai rasik. Komparasaun ho kompanhia xineza tuir realidade ne'ebe CCI Munisípiu Lautem deteta, kompanhia xineze konstrói beskos uza britas klase B, utiliza raihenek ho fatuk gratuita, ne'ebe ké tuir lolós labele akontese tamba fo prejuizu ba Estadu, maibe kompanhia Timor-oan nunca hanoin a'at ba nia rain.

Hafoin sorumutu, parte CCI Postu Administrativu Luro entrega proposal kona ba rehabilitasaun konstrusaun bronzo iha portaun entrada Suku Afabubu iha dalan ba Postu Administrativu Luro. Além de ne'e, iha mos proposta husi CCI Postu Administrativu Lautém/Moro kona ba konstrusaun bronzo iha Suku Daudere.

2. VIZITA EDIFISÍU OBRAS PÚBLIKA

Vizita ho ojetivu atu observa direta kondisaun ho ambiente servisu ne'ebe sai fator determinante ba hadian sinérjia atendimentu ba públiku. Jeralmente, ambiente atendimentu

servisu bazeia liu ba espíritu hakarak serbi rai rasik duke regras formal ne'ebe eziste, liu-liu tamba volume servisu la suporta ho ekipamentu ne'ebe suficiente. Diretor Obras Públika Munisípiu Lautem, Abrão Vieira, deklara katak nia level hanesan xefi divizaun laos diretor tamba sei infrenta problema bázika hanesan tuir mai;

- Laiha facilidades ho apoiu servisu ne'ebe apropiadu ba diretor, hanesan eskritóriu, ekipamentu, staf no seluk tan;
- Tékniku administrativu apoiu husi voluntáriu nain 2, ida servisu tinan 1 ona no ida foin servisu fulan 2, pesoal nain 2 halo atendimentu ba diresaun tomak;
- Tékniku ne'ebe destakadu husi nasional iha nain 4 ho estadu kontratadu; tékniku refere uza transporte rasik, ne'ebe kustu manutensaun ho kombusivel ba transporte inklui ona iha saláriu \$272 ne'ebe dalaruma simu trimestralmente.



Delegasaun Komisaun E observasaun ba edifisiu Diresaun Obras Públika Munisípiu Lautem, hodi haré direta kondisaun ne'ebe kontribui ba ambiente servisu hakmatek ho saudável ba funsionáriu sira. Munisípiu Lautem, Feveireiru 2021. (Dok.KI 2021)

3. VIZITA SENTRAL ÓLIU PEZADU

Objetivu husi vizita ba Sentral Óliu Pezadu hodi haré kondisaun servisu, fator rekursu humanus, ekipamentu ho facilidade ne'ebe fo apoiu ba sentral refere.

- a. **Rekursu humanus;** tékniku ne'ebe halao manutensaun ba ekipamentu totalmente husi rai-liur (xina). Iha funsionáriu Timor-oan nain 3 hanesan koordenador ne'ebe halo servisu tuir rotasaun ho horáriu ne'ebe iha.

- b. **Ekipamentu;** komputador iha área kontrolu a’at, komputador refere liu-liu halao funsaun back-up bainhira iha avariasaun urjenti, identifika a’at iha parte sinkronizador. Pedidu hato’o ona ba nasional maibe seidauk iha rezultadu. Nune’e mos, iha sala komunikasaun deteta iha makina transformador enérjia AC ba DC mak a’at. Tuir Coordenador Joãozinho dos Santos, bainhira laiha atendimentu lais husi Governu kona ba ekipamentu refere, maka bele fatal implika ba funsionamentu sentral óliu pezadu ba munisípiu tomak.
- c. **Fasilidades;** ladauk iha manutensaun jeral ba fasilidades iha sentral óliu pezadu desde funsiona tinan 2011 to’o ohin loron. Iha parte seluk, britas iha iha areadores óliu pezadu infrenta abrazaun ou mihis ba bebeik husi loron ba loron. Karik laiha atendimentu urjenti mak bele hamout tanke ho eletrik-rin prinsipal iha sentral laran.



Delegasaun Komisaun E rona-hela espikasaun husi Coordenador Sentral Eletrika Munisípiu Lautem ho ekipa kona ba kondisaun atual mákina oliu pezadu ne’ebe persiza manutensaun imediata hodi garante sustentabilidade energia eletrika ba Munisípiu Lautem, FEVEREIRU 2021. (Dok.KI 2021)

4. VIZITA SUKU LOREHE I

Objetivu husi vizita ba suku refere iha oin rua; ida, halo observaun direta ba kondisaun estrada; rua, buka klarifikasaun kona ba pozisaun autoridade suku, comunidade ho empredáriu lokal relasiona ho empedemntu prezensa Governu ou Instituto Gestão de Equipamentos (IGE) iha Suku Lorehe I resentmentente.

Suku Lorehe I hanesan suku ne’ebe estratéjiku tamba sai ponte ba kapital Munisípiu Lautem ho Suku Lorehe II ne’ebe iha tempu besik sei nakfilak ba postu administrativu

foun, inklui ho potencia bo'ot ba setor turismu. Total populasaun husi Suku Lorehe I iha rihun 5 tuir sensu 2015.

Tuir observasaun terenu, estrada ligasaun kapital ba Suku Lorehe I a'at no fo perigu ba comunidade nia moris tamba liu husi rai-naruk, fatuk laran ho rai kois iha tempu udan. Maske distansia Suku Lorehe I la dok husi kapital munisípiu, maibe estrada ba Lorehe I hahu husi ukun-an to'o agora seidauk hetan rehabilitasaun husi Estadu, pelu kontrariu comunidade sei utiliza estrada ne'ebe konstroi husi Indonésia iha tempu okupasaun. Ho kondisaun estrada ne'ebe a'at, automatikamente defikulta comunidade nia atividade hanesan, agrikutura, merkadu, eskola ho seluk tan.

Autoridade suku ho comunidade wainhira hare Komisaun E nia prezensa iha terenu, espresa sira nia suspirasaun kona ba estrada ne'ebe iha tinan barak nia laran fo defikuldade ba sira nia moris. Komunitade sira prefere apoiu bo'ot husi Estadu atu bele konstroi estrada ho valeta ne'ebe iha kualidade a'as hodi garante sustentabilidade ba tinan naruk. Komunitade sira sujere liu tan, atu hatetuk estrada ne'ebe a'as hodi hamenus dezastre ba comunidade ne'ebe tinan-tinan sempre lori vítima.

Kona ba prezensa IGE iha Suku Lorehe I, Xefi Suku Lorehe I deklara katak prezensa IGE iha suku laran tamba husu rasik husi comunidade ho autoridade suku. Xefi suku rekonhese katak iha duni dezintendimentu entre IGE ho dirijente kompanhia lokal tamba kestaun mis komunikasaun, liu-liu kompanhia laiha konhesimentu kona ba knar ho prezensa IGE iha terenu. IGE nia knar atu fo atendimentu emerjensia kona ba problema estrada ne'ebe infrenta husi comunidade bazeia ba pedidu husi autoridade lokal. Óras ne'e IGE halo ona levantamentu hodi halao manutensaun ba estrada refere ho kilometru 16 resin. Xefi Suku Deklara mos, katak momentu ne'eba nia parte labele atende kompanhia tamba laiha karta konhesimentu husi postu administrativu ho munisípiu, tuir orientasaun ne'ebe xefi suku rasik simu husi superior sira.



Delegasaun Komisaun E halao observasaun ba kondisaun estrada ligasaun Lospalos-Vila ba Suku Lorehe I, PA Lospalos, Munisípiu Lautem, Feveiru 2021. (Dok.KI 2021)

Iha tel Ximenes

ho Octavio “Oslo” rekonhese kona ba desintendimentu ne’ebe akontese entre sira (kompanhia lokal) ho IGE. Kompanhia konsidera katak mosu desintendimentu relasiona laiha informasaun antes ba sira kona ba prezensa IGE iha fatin refere. Tamba iha tinan 2016 kompanhia hetan uluk ona nota informativu husi Governu hodi konstrói estrada ho total distansia kilometrus 16.500. Kompanhia iha momentu ne’eba hasai ona osan balu hodi selu ba hamos dalan ho konstrusaun armajen, ho total gastus provolta dólares rihun walu-nulu (\$80,000). Osan ne’ebe hasai hodi konstrói mos armajen ba ekipamentu iha suku refere. Maibe ikus mai projetu refere labele kontinua tamba mudansa polítika iha rai-laran. Maske iha desintendimentu entre kompanhia ho IGE, maibe esensialmente kompanhia laiha intensaun atu empede dezvoltimentu iha suku laran no prontu submete ba regras ne’ebe iha. Responsavel Kompanhia senti esklaresidu bainhira husi Komisaun E sujere atu kompanhia refere submete ba regras ne’ebe vigor no esensialmente IGE nia prezensa laos atu hadau-malu projetu. Kompanhia sei la lakon direitu atu kompete iha selebrasaun ba projetu refere, naran katak kompanhia nafatin hatudu komportamentu diak iha terenu.

Maske Responsavel Kompanhia Tahicalu Construction deklara katak hasai ona osan \$ 80 mil hodi sustenta inisia projetu rehabilitasaun estrada iha Suku Lorehe I, maibe tuir informasaun husi Komisaun Inkeritu Parlamentar katak projetu refere foin atinji 5%.

5. OBSERVASAUN ESTRADA TRISULA – COM

Iha kategória projetu 2: ida, rehabilitasaun estrada rural “Trisula – Com” (ch. 0 + 000 – 8 + 000); rua, rehabilitasaun estrada nasional “Trisula – Com” (ch. 8 + 000 – 15 + 400).

Ba kategória ESTRADA RURAL, projetu halao husi kompanhia SALVE UNIP. LDA. ho total orsamentu \$ 4,092,376.19; Progresu fíziku atinji 50.96% husi fulan setembru 2017 to’o setembru 2019.

Kategória ESTRADA NASIONAL, projetu halao husi kompanhia FIAN UNIP. LDA. ho total orsamentu \$ 4,028,818.80. Progresu fíziku atinji 45.72% husi fulan setembru 2017 to’o setembru 2019.

Tuir observasaun, nota katak estrada refere halao ho kualidade diak no fo duni benefisiu ba comunidade enjeral. Ikus-ikus comunidade utiliza estrada Trisula – Com nudar estrada alternativu ligasaun ba-mai Díli – Lospalos-Vila tamba alkatraun kabera kompara ho estrada tuan ne’ebe seidauk rehabilita

6. OBSERVASAUN ESTRADA MAHINA I – PARLAMENTO

Observasaun ho objetivu hodi hatene kona ba kualidade projetu rehabilitasaun estrada rural “Mahina I – Parlamento” ho distansia 3,916M. Projetu lokaliza iha Suku Parlamento, Postu Administrativu Lospalos-Vila. Projetu halao husi kompanhia SAMUDRA UNIP. LDA. ho total orsamentu \$ 3,039,825.77. Progresu fíziku husi projetu refere atinji ona 100% no



Delegasaun Komisaun E akompanhadu husi ADN Munisípiu Lautem observa rezultadu rehabilitasaun estrada rural “Mahina I – Parlamento”, PA Lospalos-Vila, Munisípiu Lautem, Fevereiru 2021. (Dok.KI 2021)

progresu pagamentu foin atinji 75.79% tamba iha volume balu seidauk finaliza ligasaun dokumentu ho dezenhu.

Tuir observasaun terenu, nota katak estrada refere iha kualidade diak no benefisia duni komunidadade lokal, liu-liu fasilita komunidadade hodi halao atividade negósiu ba hadian ekónomia uma-laran. Estrada refere iha kontinuasaun kilometru 4 ne'ebe seidak finaliza tamba seidak iha kontratu. Maibe husi Kompanhia Samudra Unipessoal Lda. nahe ona raihenek hodi hein kontinuasaun. Óras ne'e komunidadade sira bele utiliza ona dalan refere hodi halao atividade moris no hasai dadauk komunidadade lokal husi izoladu ho mukit.

7. OBSERVASAUN BA ESTRADA WAIROQUE

Projetu tama kategória Rehabilitasaun Estrada Rural ho destinasau "Laivai – Wairoque – Liarafa. Projetu ho distansia 7.720M iha faze I. Projetu lokaliza iha Suku Laivai, Postu Administrativu Luro. Projetu halao husi kontrator HOWEN II UNIP. LDA. ho total orsamentu \$ 4,207,194.97. Progresu fiziku atinji ona 100%, ne'ebe halao husi fulan setembru 2017 to'o agostu 2019. Projetu extende dala 3 iha agostu 2019, dezembru 2019 no dezembru 2020.

Bazeia ba observasaun ne'ebe Komisaun halo iha terenu nota katak, jeralmente estrada refere iha kualidade diak no benefisia duni ba komunidadade liu-liu hodi transporta produitu lokal ba merkadu ho atividade seluk tan. Estrada refere halo ligasaun ba Postu Administrativu Laga, Munisípiu Baucau. Maibe infelizmente agora dadauk labele asesu tamba sei hein hela projetu faze II .



Delegasaun Komisaun E halao observasaun ba kondisaun estrada Soligira ba Wairoque, PA Luro, Munisípiu Lautem, Fevereiru 2021. (Dok.KI 2021)

VI. KONKLUSAUN

Bazeia ba deskrisaun iha leten, maka Komisaun bele hatoo' o konklusaun hanesan tuir mai:

1. Totalmente projetu obras pública ne' ebe halao iha Munisípiu Lautem kona ba rehabilitasaun setor estrada, ne' ebe maioria halao husi kompanhia lokal. Tuir rezultadu ne' ebe iha, projetu balu finaliza ona no balu seidauk finaliza. Ba projetu sira ne' ebe seidauk finaliza tamba razaun prinsipal kona ba laiha kontratu ho menus kapasidade finanseira husi kompanhia. Kompanhia menus finanseira tamba seidauk hetan pagamentu husi Governu ba projetu ne' ebe halao ona, kauza husi situasaun atual iha nivél nasional kona ba impase política. Situsaun refere ikus mai implika comunidade mak sai nafatin vítima tamba kontinua halerik iha situasaun izoladu ho mukit nia laran.
2. Menus servisu integradu ou harmonizasaun asaun entre administrador ho diresaun relevante sira iha prosesu supervizaun ba projetu implementadas, dala balu tamba fator intervensaun husi nasional ne' ebe bo' ot ho fator rekursu humanos.
3. Obras Pública Munisípiu Lautém estruturalmente konsidera ho nivél diretor distrital, maibe realmente konsidera iha nivél inferior hanesan ho xefi deprtamentu, tamba laiha facilidade adekuada sira hodi apoiu servisu diresaun, hanesan mobiliáriu, ekipamentu estasionáriu ho pesoal apoiu.
4. SAS Munisipal laiha konhesimentu kona ba total kustu pagamentu ba projetu 4 prefurasaun ho instalasaun be' e-mos iha Munisípiu Lautém tamba halao direta husi nasional. SAS Munisipal so halo akompanhamentu ba SAS Nasional-nia atividade liga ba supervizaun projetu maibe laiha kbiit atu hola desizaun, maske planu ne' ebe mensiona hatoo' o mai husi munisípiu.
5. Munisípiu Lautém iha be' e-matan ne' ebe suficiente hodi fornese be' e-mos ba comunidade iha munisípiu tomak, provolta 85% comunidade mak asesu be' e-mos. Maibe kestaun menus konsiensia responsabilidade husi comunidade ho fator jestaun sai preokupasaun ba autoridade munisípiu.
6. EDTL nudar instituisaun estadu ne' ebe hatama reseitas bo' ot ba kofre estadu, maibe EDTL Munisipal Lautém sei infrenta problema kona ba edifísiu, transporte, ekipamentu operacional, pesoal apoiu ho seluk tan.

7. Tantu EDTL munisipal no mos SAS munisipal iha Munisípiu Lautém, seidak hatene klean kona ba mudansa estatutu ba Empreza Públika, liu-liu falta konhesimentu kona ba kontéudu vantajen ho disvantajen husi mudansa refere.
8. Sentral óliu pezadu Munisípiu Lautem seidak halo manutensaun jeral desde hahu tinan 2011 to'o ohin loron (tinan 10 ona). Deteta iha ekipamentu balu mak avária hela no bele implika ahi mate ba comunidade karik laiha atendimentu imediata ba pedidu ne'ebe submete ba nasional. Ekipamentu ne'ebe avária kompostu, komputador ho sinkronizador iha área kontrolu, transformador enéjia AD/DC iha sala komunikasaun ho abrazaun terenu iha areador Sentral Óliu Pezadu.
9. Iha sentimentu diskriminativu ba CCI Munisípiu Lautem relasiona Governu fo liu oportunidade ba kompanhia estranjeiru hodi halao obra ho orsamentu bo'ot no utiliza material lokal, raihenek ho fatuk, gratuitamente, duke ba kompanhia lokal halao deit obra ne'ebe ho orsamentu ki'ik no tenki sosa material lokal hanesan raihenek ho fatuk no seluk tan.

VII.REKOMENDASAUN

Haktuir ba konkluzau iha leten, maka Komisaun hakarak apresenta rekomendasaun sira hanesan tuir mai:

1. Husu atu fo apoiu ba kontinuasaun ho finalizasaun projetu obras públika kona ba rehabilitasaun estrada iha Munisípiu Lautém, liu-liu apoiu em termus kontratu ho finanseira liu husi selu dívidas ba kompanhia lokal ne'ebe termina ona servisu. Hodi nune'e bele fasilita comunidade nia atividade kona ba hadian moris.
2. Sujere kria servisu integradu ou harmonizasaun asaun entre administrador ho diresaun relevante sira iha prosesu supervizaun ba projetu implementadas, liu husi fo kompetensia ba munisípiu hodi jere planu rasik no formasaun adekuada ba hakbiit kapasidade pesoal apoiu iha munisípiu.
3. Presiza iha balansu entre kargo ho ekipamentu no pesoal apoiu ba diretor distrital sira, liu-liu Diresaun Obras Públika, hodi nune'e bele halao knaar ho efetividade hodi hasa'e produtividade servisu iha munisípiu.
4. Husu atu iha taransparensia kona ba kada kustu pagamentu ba projetu sira iha munisípiu atu autoridade iha munisípiu bele hatene no bele monitoriza kona ba qualidade implementasaun projetu, liu-liu iha parte Diresaun Serviço Agua e Saneamento (SAS).

5. Rekomenda atu iha sensibilizasaun kona ba utilizasaun be'e-mos ba comunidade ho moderniza sistema kontrolu ba utilizador sira hodi utiliza be'e-mos ho responsabilidade.
6. Husu atu tau atensaun ba kondisaun servisu EDTL iha Munisípiu Lautem liga ba edífisiu, transporte, ekipamentu operacional, pesoal apoiu ho seluk tan.
7. Sujere atu iha sosializasaun efetivu iha munisípiu kona ba mudansa estatutu tantu husi EDTL ou SAS, atu nune'e kada pesoal bele hola desizaun ho lós no satisfas ba loron ohin ho futuro.
8. Rekomenda ho urjentimente atu halo manutensaun jeral ba ekipamentu ho facilidades iha Sentral Óliu Pezadu Munisípiu Lautém ne'ebe tinan 10 ona laiha manutensaun, hodi nune'e bele garante sustentabilidade utilizasaun enéjia elétricidade ba comunidade ho setor públiku iha munisípiu laran. Ekipamentu ne'ebe presiza apoiu, mak hanesan: komputador ho sinkronizador iha área kontrolu, transformador enéjia AD/DC iha sala komunikasaun ho abrazaun terenu iha areador Sentral Óliu Pezadu.
9. Sujere atu iha tratamentu hanesan ba empreza Timor-oan iha oportunidade atu halo obra ho orsamentu montante bo'ot, hodi nune'e bele motiva liu tan empreza lokal hodi halao servisu ho responsabilidade.

VIII. APROVAÇÃO.

Relatóriu Fiskalizaun iha Munisípiu Lautém edisaun janeiru 2021 hetan ona aprovasaun Komisaun, liu husi reuniaun ordinariu iha loron Kuarta, 4 Marsu 2021, tuku 10:00 óras Timor Leste. Prosesu aprovasaun hetan partisipasaun husi membrus Komisaun nain ne'en (6) ho rezultadu aprovasaun: Afavor: NE'EN – Kontra: ZERO – Abstensaun: ZERO.

Díli, Parlamentu Nasional, 4 Marsu 2021

Prezidente Komisaun,

Relatora,

Deputadu Abel Pires da Silva, PhD

Deputada Maria Anabela Sávio